

今若一切禁之涉於騷擾使不得任意出入甚為妨礙此條件等並改之○夜巽方南方如火氣

乙巳 上名對○左議政尚震啟曰臣本愚妄鄙夫無小善可取猥荷謬恩久忝重地衰朽日催疾病日加物理人事自可知也頃者除夕元朝宰相咸詣闕庭臣未隨行客使押宴又不進本府合坐議事亦不參廢職已過旬朔寵祿自如非才處高位不祥不事食厚祿為恥竊自料理君臣間名分雖嚴與父子情義惟均不隱不欺臣子之道也仁恕保全君父之德也然則臣情可懇臣職可辭今臣非獨疾病作祟又多過惡不稱台職固非一二臣少孤陋唯事狂妄長來趨向又不正喜談老莊之說得罪名教者多况在一家持身無法所行皆違於古道人子奉先儀節具載禮經臣則朔望不參薦新屢缺或拘俗忌至廢四仲之享忌日又終身之喪有尊客至強與說話有時取酒療病或至於變貌皆非慎修者之所為古人有身為宰相而四海無田園者臣則為兒孫或營之古人有不犯秋毫者臣於故舊饋